

ad alia pensa dimitti. Quae uero capta sint lanifica, umore lentescere, mox in fila tenuari iunceo fuso. Nec puduit has uestes usurpare etiam uiros leuitatem propter aestiuam : in tantum a lorica gerenda discessere mores, ut oneri sit etiam uestis. Assyria tamen bombyce adhuc feminis cedimus.

XXVIII (24). Araneorum his non absurde iungatur 79
natura, digna uel praecipua admiratione. Plura autem
sunt genera nec dictu necessaria in tanta notitia. Phalangia ex iis appellantur quorum noxii morsus, corpus exiguum, uarium, acuminatum, adsultim ingredientium. Altera eorum species nigri, prioribus cruribus longissimis. Omnibus internodia terna in cruribus. Luporum minimi non texunt, maiores in terra, et 80
cauernis exigua uestibula praepandunt. Tertium eorundem genus erudita operatione conspicuum. Orditur telas, tantique operis materiae uterus ipsius sufficit, siue ita corrupta alui natura stato tempore, ut Democrito placet, siue est quaedam intus lanigera fertilitas : tam moderato ungue, tam tereti filo et tam aequali deducit stamina, ipso se pondere usus. Texere a medio incipit, circinato orbe subtemina 81